

## বাতিক

অংশুমান কুমার সেনশর্মা লাহিড়ি | নামটা অদ্ভুত । কিন্তু তার চাইতেও অদ্ভুত অংশুমানের বাতিক। তিনি লোকেদের obituary লিখতে ভালবাসেন। তাঁদের মৃত্যুর আগেই।

সবুজ রঙের একটা মোটা ডায়েরি আছে অংশুমানের। তাতেই তিনি চেনা, আখ-চেনা, খুব কম চেনা - সবরকম লোকের অবিচুয়ারি অতি যত্নে লিখে রাখেন | কারুর সাথে পরিচয় আরো ঘনিষ্ঠ হলে , অথবা তার ব্যাপারে মনোভাব বদলালে , অংশুমান নিয়ম করে সেই অবিচুয়ারিতেও বদল আনেন । এ এক অনন্ত প্রক্রিয়া । নিজের স্ত্রী অন্তরার অবিচুয়ারির চুয়াল্লিশ-তম সংস্করণ অংশুমান কদিন আগেই লিখেছেন।

ঠিক কবে থেকে এই লেখালেখির ব্যাপারটা শুরু হয়েছে বলা মুশকিল। এখন তাঁর চেনা পরিচিতরা প্রায় সকলেই এই উদ্ভট খেয়ালের কথা জানে। প্রথমে অবাক হলেও , এখন আর এ নিয়ে কেউ বিশেষ মাথা ঘামায় না ।

কিন্তু অংশুমান যেদিন তাঁর ৩ বছরের ছেলে পলটু-র আইস-ক্রিম খাওয়া দেখতে দেখতে ডায়েরিতে "মিষ্টি খাবার-এর প্রতি বরাবরই ঝোঁক ছিল" লিখে দিলেন , সেদিন আর অন্তরা বৌদি মাথা ঠাণ্ডা রাখতে পারলেন না । তুমুল চিত্কার-চঁচামেচি এবং কিছু কাপ-গেলাস ভাঙ্গার আওয়াজের পর ( এই প্রসঙ্গে অন্তরার অবিচুয়ারি উল্লেখ্য : "রেগে গেলে অন্তরার মাথার ঠিক থাকত না, হাতের কাছে যা পেত তাই ছুঁড়ে মাটিতে ফেলত" ) , দেখা গেল অন্তরা বৌদি এক হাতে ছেলে পলটু , আর অন্য হাতে একটা ঢাউশ লাল সুটকেস টানতে টানতে ট্যাঙ্কিতে উঠে পড়লেন । সোজা দাদার বাড়ি । মাথা ঠাণ্ডা হতে প্রায় একমাস লেগেছিল ।

ওই একমাসে অংশুমান স্ত্রী-এর মান-ভঞ্জন করতে একবারও শ্যালকের বাড়ি যাননি। কারণ ওই মানুষটিকে তিনি একেবারেই পছন্দ করতেন না । " মৃত ব্যক্তির সম্পর্কে খারাপ কথা বলতে নেই , তাই এইটুকুতেই শেষ করছি। "

এই ধরনের ঘটনা কিন্তু অংশুমানের জীবনে আদৌ ব্যতিক্রমী নয় । তাঁর এই উদ্ভট বাতিকের ঠেলায় অংশুমান প্রায়শই অনাবশ্যক জটিল পরিস্থিতিতে পড়েছেন।

অংশুমান নিজেও এক সময়ে বুঝতে পারেন যে তাঁর এই অভ্যেসটা খুব একটা স্বাভাবিক নয়। কিন্তু এই অবিচ্যুয়ারি লেখা তদ্দিনে তাঁকে নেশার মত পেয়ে বসেছে। উদ্দিষ্ট ব্যক্তির বিভিন্ন আচরণের যাতে ভুল বিশ্লেষণ না হয় অবিচ্যুয়ারিতে, তার জন্য সাইকোলজির অনেক মোটা মোটা শক্ত শক্ত বই ও পড়ে ফেলেন তিনি। অবিচ্যুয়ারি লেখাটাকে একটা শিল্পের পর্যায়ে নিয়ে গেছেন অংশুমান - এটা বলা অত্তুক্তি হবে না। অংশুমান কি করেন, কি খেতে ভালবাসেন, কোন ফুটবল টীম কে সাপোর্ট করেন, শাস্ত্রীয় গান শোনেন নাকি আধুনিক - এসব কোনো কথাই তাই আর প্রাসঙ্গিক নয়। বলা যেতে পারে এই অবিচ্যুয়ারি লেখার অভ্যেস এখন অংশুমানের পরিচয় হয়ে দাড়িয়েছে। আজ অবধি বোধহয় পাঁচশোর ওপর অবিচ্যুয়ারি লিখেছেন অংশুমান - কম কথা নয়।

\*\*\*\*\*

\*\*\*\*\*

\*\*\*\*\*

[ এটাই অংশুমানের নিজের লেখা সর্বশেষ সংস্করণ। সবুজ ডায়েরির আর অন্য কোনো পাতায় বোধহয় এত কাটাকুটি আর রদবদল ঘটেনি।

আসুন আমরা সবাই এখন অংশুমানের আত্মার শান্তি কামনা করে দু মিনিট নিরবতা পালন করি। ]

## সমাপ্ত